

本朝分省人物考

人物考卷之九十八目錄

山東登州府

高翼

王綱

孫遇

解延年

許銳

曲銳

于鳳喈

叢蘭

于訓

王時中

何亮

陳鼎

任忠

張濬

浦鉞

張子立

卜懷

孫鵬

徐應魁

陸僑

魯麟

補遺

孫祿

郭宗臯

萊州府

黃福

儀智

侯庸

鄧燧

隨贊

呂讓

辛曜

戴綸

張信

薛祿

戴新

李綱

李公諒

滕宗智

樂瑄

韓福

譚溥

張斐

孫洪

馮緒

官廉

李介

咎誠

宋漢

侯尚文

劉紳

官賢

毛紀

藍章

匡翼之

李昆

郭東山

鄧中和

高迪

藍田

王蓋

張鉞

李鳳

翟瓚

任萬里

范階

王漸

孫夢豸

張鯉

趙慎修

劉祐

盧宗哲

趙煥

毛聚

孫惟中

遼東

附山東末

陳壽

韓斌

賀欽

傅鑰

本朝京省人物考卷之九十八

山東

登州府  
萊州府

高翼

高翼棲霞人洪武中以才行卓異薦于朝累官至都察院左都御史才氣恢偉人敬畏之後佐師雲南有功累蒙白金文綺之賜

王綱

王綱字振紀黃縣人性朴雅家貧親老日耕夜誦未嘗廢學由歲貢中正統丙辰進士授戶部主事陞陝西按察司僉事奉勅總理屯田臨事敬慎務在公

道不苟於責人雖盛怒無惡言厲色士卒仰戴如父母嘗署督學校較閱精審生徒至今稱之在任七年累疏求退詔許進階副使及歸囊無贏餘惟詩書數卷人咸稱之曰清白吏年七十三歲卒于家

孫 遇

孫遇字際時福山人正統丙辰登第以民部郎出守徽州爲政以敦風化爲本以節用愛人爲先伸烈女兩世之寃決潭社五十年之獄祁門有虎患爲文祭而遣之瑞麥生于野有一禾而四穗者以父憂去民詣闕保留乃奪情任職後又以母憂去民遮道環泣



至車不得行服闋復補徽州府增秩賜金居徽凡十八年民依之猶慈父焉尋遷江西右布政使會臨川王有罪安置西山遇奏其子女萬一失節柰國體何以五百緡嫁其女於民間後以河南布政使致仕獨居三十年家無長物子四曰珂景泰甲戌進士授監察御史陞大理寺丞曰珪成化戊戌進士授翰林院庶吉士後除禮科給事中曰瓚舉鄉進士曰琰成化辛丑進士授中書舍人累官尚寶司少卿孫二曰槃曰樂同登第宦業纍纍人謂其積慶之長云

解延年

解延年字世紀棲霞人賦性聰慧博貫羣籍正統己未登進士第授戶部主事轉員外郎尋知四川順慶府皆以廉慎服官後去任垂橐而歸郡民思之立廟于郡治堂後仍祀名宦所著有策學指歸物類集說叙古千文集解本草集略經穴圖解行于鄉

許銳

許銳登州衛人成化辛丑進士由行人授河南道監察御史有澄清天下之志孝宗初中侍梁芳陳喜韋興以先朝寵臣擅權鼓亂銳再劾罷之時臺閣條詔阻塞言路乃力陳其奸以修省事劾罷中官劉言

徐溥及按口北條陳處置邊務六事陳言時政十二事切當時宜俱得允行又言預備虜患以保重地莫善於用得其人莫不善於私隸其兵蓋劾鎮守等官之分管壞兵也深中弊政人嚴憚之按南畿屏奸旌直人服其公適星變陳修政弭災八事事辭剴切忤當道出僉山西按察事時兄鉞以國子生養母於家乃陳情終養待兄仕疏凡三上未允憂鬱成疾而卒

曲 銳

曲銳字朝儀萊陽縣人成化辛丑進士任大理評事寺副爲福建四川按察僉事松藩兵備副使改河南

轉陝西按察使都察院右僉都御史巡撫寧夏進南  
京禮部侍郎改右副都御史仍巡撫寧夏銳既屢陞  
劉瑾怒其不謝矯令以舊任冠帶閒住瑾誅復其官  
階以疾卒銳有吏能所至獄無滯囚其在四川馬湖  
土官知府安鰲恣橫行部者多避之銳誘執置之法  
疏請改流官州人德之以父憂去服闋給事中劉蒞  
請令復任四川以爲其才宜治蜀其後不污逆瑾蓋  
亦有自守云

于鳳喈

于鳳喈字世和萊陽人成化辛丑進士歷行人刑部

員外郎中弘治十二年陞浙江嘉興知府正德二年陞雲南左叅政以祖母張老得請終養五年入爲太僕少卿六年陞南京太僕卿八年轉南京大理卿尋卒訃聞賜祭鳳喑勤敏有治才爲嘉興守時值歲歉賑濟得宜多所全活惠政纍纍人咸戴誦之

叢蘭

叢蘭字廷秀文登縣人弘治庚戌進士除戶科給事中巡光祿寺見有司飾皇垓供器疏崇尚異教爲先朝遺弊當亟罷尋以外艱歸終喪復職巡房山諸草場蒞內庫出納多所釐正時災異疊見上言消變

當從實行今日之務在借人才慎舉錯恤畿民撫邊  
戍警息玩杜貪殘元惡如中官汪直輩之陰圖復用  
奸貪如侍郎林鳳輩之未見罷黜左道如太常卿崔  
志端之紊亂舊章皆宜懲處以順上天遏惡之命尋  
陞兵科右給事中內降以署都指揮吳安爲都督及  
邊將姚信以失機獲宥皆極論之大閱京營與司馬  
馬文升同心協議務祛宿蠹在科十餘年遇事必言  
言必盡奏劾中官何文鼎至於忤 旨下獄而侃侃  
大志未嘗挫焉陞通政使司右叅議會災異求言又  
偕同官疏時事列上明年轉左叅議適北邊有警經

略紫荆等關塞蹊隧可通胡騎者數百處復於浮圖  
峪夾岸創起敵樓增戍兵易將領諸所籌慮皆百年  
固守計邊人賴之以內艱歸終喪還朝陞右通政庚  
午之春逆瑾請遣官規畫邊務兼督糧儲清屯田抽  
選軍丁檄往延綏至則寧夏之變作矣延綏人竊議  
洵洵比入境鎮之以靜衆乃少安時方覈邊功賞不  
時下文武官以罰米賠糧繫獄久不克完其謫戍除  
名沒產者多出鍛鍊考察之令一歲至再三舉行邊  
民以催徵逋負逼迫外竄將家由武舉進者分隸各  
鎮類愁寂不能聊生偵事之卒紛紜四出所過莫不

危懼蘭以爲此數事皆人心所甚不便宜速改而不  
容緩者疏至詔悉行之瑾銜甚弗已欲中以禍數月  
瑾誅陞通政司使未決旬陞戶部右侍郎兼左僉都  
御史奉 勅督寧夏等處糧儲值歲旱禱於羣望鞠  
寃緊釋之三邊皆雨先是開平鹽引利皆歸於權右  
至捺奸剔蠹紀法肅然商通而事乃濟諸有補於邊  
儲者一一條上行之是年夏又奉 勅兼管固靜等  
處軍務聞山東河南郡盜倡獫念內地齊民猝遇兵  
變必不勝供億之苦亟疏於 朝請別處軍餉以紓  
民急會廷議亦念中都地重兵荒相仍亟召巡撫廬



鳳滁和并以賑濟委之七年春至鳳陽賊已壓境督  
率吏士防遏緣河諸渡口警報至卽躬擐甲胄身先  
士卒奔走邀擊俘斬二千餘級溺而死者數萬撫釋  
脇從男婦幾六百人事聞 賜勅獎勵賚以金帛秋  
九月師還老稚攀留滿車下還 朝論功陞俸一級  
廕一子爲太學生加賜金帛羊酒宴於禮部捌年又  
以虜警奉 勅巡撫西路諸關兼督宣大軍餉九年  
春陞右都御史總制宣大并山西偏頭寧武鴈門等  
關軍務至邊相地設險令內地居民各築堡入保亦  
如塞下賊嘗一再深入蘭自駐陽和以當其衝分部

諸將伏兵要害遣謀者往來傳報或倚或角賊乃遁  
我兵又據險邀之斬獲百有餘級虜酋傷右臂而馳  
捷聞 賜勅犒勵然坐與監軍不合其功竟爲所攘  
十年自軍中還 命總督漕運兼巡撫鳳陽諸郡蒐  
剔宿弊改立條約著漕運錄行於世權右以私貸訴  
償皆置不問因以蜚語中之遂罷管漕運專理巡撫  
值歲饑民多流亡上奏截漕粟數萬石益以倉儲賑  
之全活無算水漕主事王鑿以抗直忤中貴史宣逮  
繫詔獄上疏宣不法狀鑿當亟釋中官劉允以迎佛  
使烏思藏所過誅求百計勢張甚乃預檄有司毋循

所欲䟽斥佛老無益乞還允勿遣高墻庶人有逸而出者又乞併釋其無罪者以篤親親守備丘德以貪虐擾人特禁之德爲少戢十四年逆濠變起率兵禦之江擒僞諜百數武宗之南狩也屢賜顧問例有宴多侈費求媚者蘭惟金酒卮一事餘皆磁漆進獻物視他郡僅十之一二逆彬數有讒言竟亦無他以六年考滿進階正治上卿其冬陞南京工部尚書聞報乞歸展掃已決退休之計明年世廟繼統方任耆舊三疏請老不允冬以濠平復陞俸一級屢疏乃允致仕踰年不起卒年六十有八器度闔偉才識英

敏所學期於經世而言論足以發之自筮仕以來屢將使命經營四方未嘗以艱險避而孝悌篤於家庭信義孚於交友儉約廉慎終始不易又人所難及者

于訓

于訓字文教萊陽人少爲諸生屢屈場屋以貢入太學試銓曹授連城知縣兩值艱服除改知無極邑多豪家不法李某者以武斷刃其從父大言曰吾以千金賄令吾無慮矣訓捕之急其人自縊而死學宮敝訓毀淫祠木石拓而大之風教勃興濔沱河溢沒田以萬數巡撫徵郡吏治曰是役也非于無極不可訓

隄防繕完人無怨咨遷倅順德督餉于京屬吏有以  
贖來者悉不受內黃有殺人疑獄二十載不決往獄  
之卽釋流賊之變從官軍討之將校貪功欲殺被擄  
者訓誨之曰民幸不死賊乃死于軍民何罪哉將校  
乃不敢殺活者幾萬人訓寬簡沈靜或數日不答一  
人嘗曰古之人視民如傷今人每欲傷之何也令無  
極無極爲之立生祠曰昭德倅順德順德爲之立生  
祠曰遺愛嘗自言我東海于公之苗裔也實多陰德  
可謂有祖風矣享年八十有八

王時中

王時中字道夫黃縣人弘治庚戌進士授鄆陵知縣  
闢田勸農興學厚俗振靡剔蠹綏良糾奸流移來歸  
飛蝗遍鄰壤而鄆陵獨無頌聲四起旣去立碑以志  
至今父老有望碑泣者嘗出郊旋風擁馬首不得行  
時中日必冤氣也俾隸人尾之旋入蔬圃繞胥井不  
散召主者根究其故乃少婦外通殺其夫掘井果得  
屍人以爲神有點豪專持官司短長虎視一邑時中  
暴其奸抵之法丁巳選授監察御史督察畿輔馬政  
母喪起服還臺正德初逆瑾煽亂毒痛海內時中抗  
疏極論瑾啣之讖名於屏已而時中巡按宣大見綱

紀躡弛上下玩愒日甚極意振飭風稜肅然總督宇  
瑾私人也嘗爲賊吏所求於時中不從宇旣憾之陰  
與瑾謀矯詔繫逮令荷重枷露立三法司之前三日  
閣臣力援乃釋械遣戍鐵嶺衛庚午瑾伏誅用薦爲  
四川按察副使時廖鄔兵起震蕩三川總制尚書彭  
公澤檄備重慶保順諸路時中據江爲險增陴浚隍  
繕甲勵兵申飭禁令嚴遣間諜寇賊不敢東向百姓  
不及于難事平受白金文綺之賜遷湖廣按察使清  
冒籍折僞券解結疏滯楚民安之雅不喜奢麗僚友  
設燕席過爲繁縟命撤其三分之一乃就坐事事有矩

陸右僉都御史巡撫寧夏疏言惠寧堡北  
去鹽池不遠實爲虜騎出沒之衝請於此築城爲備  
置將設兵列墩臺使烽堠聯絡足以扞固鎮城遠爲  
靈州聲援又言今將佐貪而愛身士卒悍不用命尺  
籍不登常額而傭係私門者衆帶甲控弦者無幾矧  
復扣縮歲支辦納月金是冗食無補空名而鮮實也  
且士卒提馘不賞死士不以名聞戰敗則偏置將佐  
於事何益又請靈州建學檢武臣子弟行伍之異秀  
羣肄其中大發丁夫鑿漢唐故渠自是數百里內畝  
歲登巡花馬池還謀者報虜數千騎入寇時中日賊



遠來疲矣利於速戰乃戎服據鞍夜馳五十里至與  
武營與虜遇指麾諸將分布士卒鼓譟而進斬首三  
十餘級時 武皇在榆林捷奏大悅 賜蟒服玉纒  
環旌其功辛巳召爲右副都御史入佐院事因請覲  
省旋丁父憂嘉靖甲申服闋以舊官起用慶王居西  
夏所爲多不法撫臣列上罪狀 上命時中往按之  
盡得其情奏廢爲庶人進兵部右侍郎未幾遷左  
上出 獻皇帝宸翰賜時中丙戌陞尚書奉 勅提  
督團營侍 經筵乃甄才勇汰懦弱隨器授事無不  
任者丁亥 賜恩紀合春堂集 御製五箴註文獻

通考諸書秋鄭村壩有盜嘯聚數百人剽掠鄉邑守  
臣輒張皇請兵時中曰無以爲也此亡命挾惡少竊  
發爾檄武帥乘賊不意以偏師宵濟遂大破之擒首  
惡數人脅從咸釋尋陞刑部尚書原情考法屢奏平  
反秩滿 賜寶鏹羊酒進投資政大夫星變條上六  
事引咎陳退 上優詔答之 詔許致仕時中自以  
侍 三朝歷中外四十年晚得領骸骨休居林下保  
茲終始從容與鄉人觴咏爲樂壬寅元夕坐燈棚下  
觀諸孫羣嬉猶酌酒爲歡十六昧旦遂死先數日家  
人隱約見車葢節幢甚都若迎送狀是日寥廓中聞

鼓吹音年七十有七所著有奏議十卷海山集若干  
卷藏于家

何亮

何亮字文明登州衛人弘治壬戌登進士第除陝西  
咸寧令秦俗婚姻尚財爲諭以古禮士貧有弗能葬  
娶者捐俸以給所施卓有惠政擢南京戶科給事中  
遂條劾劉瑾悖逆不臣等事幾遇禍瑾誅復奏請以  
其財貨充邊用迺除漢陽府守釐弊除奸百度振刷  
未幾以疾卒于官副使蔡潮請立祠祀之

陳鼎

陳鼎字文相登州衛人弘治乙丑登第授禮科給事中劾廖愷子姓倖舉鄉試會流賊起條陳弭盜機宜與巨璫爭辯不屈坐事繫獄罷歸里嘉靖改元詔復職陝西叅議撫治商洛時逆賊猖獗聲震三輔督兵平之擢副使兵備延綏番夷叛化三十餘年比至撫循有方及處哈密事竣擢浙江按察使尋陞應天府尹未任卒

任忠

任忠字原孝登州衛人忠天性孝友強學懋修登正德辛未進士授工科給事中忠出入不避權貴宦豎

而辭指忠婉 上屢賜嘉納後出守天雄歷江西燕  
叅浙江左右方伯朴素自甘所入惟常祿給日用耳  
人有言之者忠笑而却之曰古人不以財累子孫况  
後之庸庸者耶且吾分當然又何侈焉以清廉著名  
當途累官至陝西巡撫卒于宦邸 朝廷追褒賜之  
葬祭

張 濬

張濬黃縣人幼穎悟舉正德辛未進士授常熟尹邑  
有十四坊每坊以一人輪通直衙供具不貲悉剗革  
之山虎爲患至是虎負子避去行春至西郊民有裸

程于野與姑嫂事農恠而杖之遂著爲令又立吳公  
偃之後使奉祠民翕然嚮風焉

浦 鉉

浦鉉字汝器登州衛人正德丁丑登第調洪洞令擢  
監察御史廷議大禮奪俸半年劾郭勛姦貪奪俸三  
月時尚書林俊陶琰徵入而復出太監秦文旣出而  
復入鉉上疏曰非內君子外小人以保泰之道也言  
恤災防虜罷織造三事巡居庸關陳邊務六事時政  
六事掌河南道司考察仍黜貪屏邪了無避忌巡按  
陝西上疏論救楊爵下獄死今祀鄉賢祠

張子立

張子立字原禮黃縣人年二十四登第除行人遷監察御史按浙江郡守憚其風裁望塵下拜曰人有慾故不剛竟以罪斥之巡撫延綬修城堡開紅石峽以通水利民庶攸賴用兵西夏失利遂被逮士民號泣遮道中使亦泣下延人爲立碑于學宮自奉清約好古文戍居固原杜門謝客來則荅之否則不見曰往役義也往見不義也居常思親爲涕泣不御酒肉竟以疾卒

卜懷

卜懷寧海人父早卒母教之甚嚴常課其業輒以杖擊之母年九十六卒懷執母杖而泣曰安得復教我耶祀其杖于母側因廬於墓人以孝稱之有司以其事上詔旌其門後歲貢就銓遂以孝行擢首選授湖廣鄖陽府通判以循良著聲

孫鵬

孫鵬文登人性至孝粗獵經史日侍父母左右飲膳必躬視昏定然後就寢里人多則之母卒鵬哀慟水漿不入口者七日幾絕既葬依墓弗去時隆冬大雪且無棲廬寒苦不堪族人勸歸不從遂相與三日而



成一廬鵬朝夕哭奠負土增墳忽野燒將及廬鵬望  
拜風返而火滅墓上枯木秋生萌蘖人以爲孝感所  
致三年衆勸歸鵬曰孤少多病五歲方離親懷抱今  
當五載以酬親德又二載始歸楊叅政維聰聞之曰  
是可以風吾民矣遺粟勸犇縣令王允言奏聞旌表  
其門

徐應魁

徐應魁登州府庠生有至性父母早世孝祖母盧氏  
有聲妻朱事之尤篤盧歿魁哀毀嘔血隻身廬墓跣  
足取薪水爲粥朝夕哭奠負土成墳至冬雪深數尺

廬門道徑盡封水火絕六日魁幾死忽地響若雷廬中醴泉湧出能愈疾服闋鄉黨數千人迎歸次日復地震而泉竭孝感羣盜餽以百金入之於官知府李承選賜塚地官宅提學李化龍賜廩併辭之士大夫立感泉碑妻亡竟死不娶耿耿孤貞始終一轍御史韓應庚扁其門曰至孝格天事聞旌表有孝孫傳行于世

陸僑

陸僑登州衛人鎬次子重厚清修事親盡其孝母病剖骨愈年至九十四人曰孝徵喪葬一秉家禮鄒督

旌之仕廣平縣訓導以廉勤善教著稱卒于官有  
寓庵文集家禮易簡聲歌正脉初學輯略等書行于  
世

魯麟

魯麟字文瑞棲霞人世家於縣之朱留社爲諸生時  
天資朴茂學問精博鄉邦推尊學徒羣集筮仕令桃  
源縣時監察御史張士隆與楊州孫知府有郤士隆  
以麟與孫同里閉嗾之奏調長淮衛經歷其地貧瘠  
人難之而麟了不介意直已守義自效官之外無他  
慮當道有知之者安造軍艦其利頗餘竟無纖毫染

指人益重其介以秩滿陞貳滄州猶介之志始終不移及謝事歸杜門講學足不至官所者幾二十年卒年八十餘士林重之

補遺

孫祿

孫祿登州府棲霞人弘治間進士以戶曹出知揚州府性骯髒不善脂韋遇事有執卽上官勵聲色以加之屹然不爲動也後爲瑾禁錮詔獄者數年瑾誅得釋累官浙江布政使

郭宗臯

郭宗臯字君弼山東福山縣人嘉靖八年進士  
部主事改湖廣道御史建言巡杖十四年巡按蘇松  
陞山西副使丁憂復補山西陞大理寺少卿累陞南  
兵部尚書疏請致仕

萊州府

黃福

黃福字如錫昌邑縣人生而岐嶷異常兒洪武初父  
令讀書鄉校甲子得雋鄉闈升胄監歷項城清源二  
邑主簿惠政及民壬申陞金吾前衛知事乙亥調龍  
江右衛戍寅陞經歷善於贊畫是歲四月上章論國  
大計太祖嘉納超授工部右侍郎日見親幸福感  
激圖報爲政益力譽望日隆成祖正統治齊黃離  
簡之罪李景隆指爲奸臣逮獄福曰臣居大臣固當  
死奸臣之名臣不敢當上壯其言釋之調左侍郎

未幾陞工部尚書永樂二年奉命修補國子監經

籍板三年調北京刑部尚書朝廷以安南土酋僭

號弗庭興師問罪福承命先赴兩廣營辦軍用處置

有方應期而集黎賊就俘郡縣其地設三司控制其

土命掌布政按察二司事夷民初附叛服不常福視

民如子撫綏有道廉明正大抗志不阿鎮守中官馬

騏怙恩肆虐數裁抑之騏誣奏福聚太原宣化等府

民兵欲爲不軌福亦具奏陳情上深燭其妄寢其

事居交趾幾二十年及仁宗卽位上言六事悉見

採用驛召還京父老不忍舍去泣送於塗者不啻千

萬人至遮道不能行及抵京仍爲工部尚書兼詹事府詹事 賜以白金綵幣洪熙乙巳扈從 東宮至

南京 宣宗嗣位命董 獻陵事賜賚優渥適馬騏

激變交趾兵部尚書陳洽累疏乞福復鎮遂驛召還

京 上命仍領布政按察二司事時黎利據別城叛命將討之及至賊境將非其人失利福被執有酋首

識之者抱持福泣且曰此我翁黃也仍集衆羅拜且

曰公不北歸我曹不至此言已皆泣旣而酋首以已

乘舁至營黎利出迎卽置上坐問福所欲福厲聲曰

我 天朝大臣今至此願爾等速殺我耳黎利等連



聲曰我父母我父母以厚資昇送出境乃上章曰禮  
送賢良福至龍州悉以遺物歸諸官庫分毫無與時  
總兵王通等爲法司所劾被收福旣陞見 上以福  
不預軍旅特宥之卽勅與平江伯陳瑄總督漕運數  
年來河道疏通舟艦無阻福又以遠輸勞費建言三  
事一曰足食二曰足兵三曰省役宣德壬子調南京  
雖耳目不職筋力衰微惟念 四聖眷顧之隆絕口  
不援例以謝政乙卯奉 勅守備南京叅贊機務是  
年陞少保兼戶部尚書有白金綵幣之賜正統紀元  
待疏上言四事曰鈔法曰鹽法曰官俸曰田賦皆切

時務福風儀修整不妄言笑志氣豪爽器識過人忠  
敬孝友出於天性剛毅正直士風所屬其學根於經  
術不爲無用之文而典雅有法其在安南復輿地增  
置郡縣籍編氓定賦稅而上其名數他若芻蕘之積  
軍餉之儲皆屬借辦庶務浩繁雖日不暇給而隨事  
制宜咸有條理又能鎮之以靜上下帖然恒戒官屬  
毋苛急於政毋侵漁其民時召父老諭以 朝廷德  
意俾各安其生理有懷來安輯之功學校新設未有  
教官選待次之官有文學者委攝學事生徒知學漸  
有可觀官有改任及降者初至或貧乏量給公廩以

用之病故者給樞而歸其骨政務稍閒則俾椽吏輩  
講讀大明律及小學使知守法持身之道罔弗悅從  
福素習律令藩憲具獄立斷之輕重得當主者不敢  
高下其手而矜恤之意藹然行於其中自小官至一  
品始終以國家生民爲心斥奸闢諛無所顧忌下人  
有過多見優容 成祖嘗命解縉論羣臣自蹇義以  
下凡十八人皆有褒貶獨福則曰秉心易直確有執  
守 上深然之兵部侍郎徐琦使安南回福往見於  
石城門外或指福問安南來使曰汝識此大人否對  
曰南交草木亦知名安得不識在官幾六十年廉介

自守家無餘財自奉甚約妻子僅給衣食所得俸祿  
惟待賓客周匱乏而已嘗慕范文正公爲人誦先天  
下之憂而憂後天下之樂而樂之言因號曰後樂平  
生所作詩文有後樂堂交藩文集後樂續集歲已未  
疾屢作猶強力視事判署文牘忽焉奄逝都城縉紳  
士大夫無不哀傷走吊哭者雲集其第訃聞遣官祭  
葬謚忠宣贈太保

儀智

儀智高密人洪武中薦爲教官知高郵州州人愛之  
曰知州長者陞知寶慶府寶慶人徇悍又畏敬之曰

太守不可犯永樂二年選東宮官陞通政兼右中允  
未幾陞湖廣布政使三年進禮部侍郎十一年元旦  
日食呂尚書請賀如常智獨爭議不可衆韙之上  
令吏部翰林院擇一老儒侍太孫明日太孫召問得  
人未蹇及西楊交薦之 太子曰吾嘗舉李繼鼎太  
悞悔無及如智誠端士然老矣西楊稱智起家學官  
明理守正精神未衰廷臣中老成正大無踰智者是  
日午朝 上顧太子問曰侍太孫講書得人未太子  
應曰舉禮部侍郎儀智議尚未決 上喜曰得人得  
人智雖老能直言元旦日食執議免賀甚得太體智

可用也智寬平嚴正尚忠厚遇事是非又輒別白爲  
太孫陳說不屑附會年八十致仕卒贈太子少師謚  
文簡子銘字子新學于吳訥天性易直孝友舉經明  
行修洪熙時爲行在禮科給事中歷編修侍講正統  
中爲郟王長史 景帝初爲禮部侍郎未幾召爲兵  
部尚書尋掌詹事府事卒贈太師謚忠襄

侯庸

侯庸字景中平度州人生七歲父坐累謫閩南稍長  
母告之故庸悲痛誓贖父罪洪武間舉進士拜吏科  
給事中請納官代父辭甚哀切 上憫之詔還其父

庸至謫所迎歸尋陞吏部侍郎時學士劉三吾葛鈞受命授晉王世子經庸劾三吾等在職怠惰宜降別用上納其言庸獲知遇如此惜乎早卒

鄧燧

鄧燧高密人中洪武庚午鄉試任南和教諭會署縣事靖難兵起燧監城守因坐謫戍興州而死識者哀之

隨贊

隨贊字從禮卽墨人性果敢有才略洪武初以元故官赴京授六安州英山縣主簿時陳友諒餘孽王玉

兒以妖言惑衆殺掠吏民贊集民兵捕之擒玉兒并其黨與數百人獲偽印器仗送京師上召見賜宴勞之加賜白金五百兩綺帛各八疋陞知縣民有爲虎害者贊移文于城隍虎遂死于民被害之所因斬其首懸城隍廟門虎患永息陞袁州通判政簡而事治流民歸業田野墾闢郡人德之立碑以紀其政洪武三年陞廣東按察使

呂讓

呂讓字克遜平度人洪武中由進士任行人時安南反上遣讓諭之讓乃爲書與安南國王王饋黃白



二金及沉檀香等物讓却之曰尉陀以區區之越與天子抗衡是召禍者也陸賈受金以分諸子是苟利者也王顧以尉陀自處而以陸賈處人何其陋哉王無以對後遷監察御史終陝西僉事

辛 曜

辛曜字耿之卽墨人天性聰敏廉厲剛正博學下問尤長于詩應洪武年間貢以建言授吏科給事中累有政績擢陝西按察使永樂間勅同昌邑黃福撫安交趾軍民寧息陞交趾布政九年致仕年九十終

戴 綸

戴綸高密人由人材進階侍郎見知于太宗仁宗爲太子時好田獵綸以侍讀累諫不聽因奏上召太子問曰汝平日與誰相得對曰戴綸因示所奏太子嚙之及卽位因詰前事綸乃抗聲辯論辭益激切因怒被箠死天下聞而哀之

張信

張信字彥實掖縣人天性至孝母病數更醫不效聞割股可救卽自割臂煮液進之遂愈永樂初鄉里上其行有司達于朝詔旌其門命爲尚寶司丞居官勤慎處同寮能讓有過舉輒自引咎陞少卿適用寶函

封版內夾敝故紙 仁廟召詢之對云在函封內臣不敢預知函封外則臣之罪遂遣自陳同官有教之他援覲免者信對曰不敢自欺况敢欺君父乎有旨薄罰復職廷論重之 仁廟嗣位首進尚寶司卿授奉議大夫年六十有六卒葬應天府城南鳳栖鄉

薛祿

薛祿膠州人洪武末有靖難功永樂初營建北京祿董其事復從征胡虜宣德初從征武定屢立戰功進爵太師封陽武侯祿爲將勇智兼備紀律嚴明善撫士卒褻創赴鬪有進無退所向成功卒追封鄴國公

謚忠武

戴新

戴新字景一平度州人永樂初舉進士選入翰林爲庶吉士侍仁宗講讀遷主事以坐累謫戍未幾朝廷特宥復職累官雲南右布政兩征麓川贊畫糧儲不乏賜賚甚厚

李綱

李綱膠州人永樂間舉進士任兵科給事中性至孝廉介儉約朝野稱爲孝廉卒于京師貧不能斂鄉人同仕者賻贖得歸葬

李公諒

李公諒濰縣人性沉重寡言以賢良舉爲翼城知縣時兵燹之餘民不聊生公諒教民食野菜槐豆五易水煮之以濟饑民免流離驛中常有崇使客靡寧公諒移牒城隍神其崇遂滅終廣州知府

滕宗智

滕宗智掖縣人永樂間由舉人選授御史時大難方靖朝政多闕權貴用事宗智正色立朝彈駁不避上疏論肅朝綱振國勢八事多見采納

樂瑄

樂瑄膠州人由正統進士任刑部主事陞員外郎有  
中貴逮獄同官顧望不敢問瑄毅然鞠之中貴卒服  
辜衆嘆服時大同多事缺知府少師楊士奇薦用之  
瑄依山爲塹兵禦其外民處其中綿亘千餘里境內  
晏然

韓福

韓福膠州人由正統進士歷鞏昌知府入覲考廉能  
第一賜衣一襲加叅政俸仍治鞏秩滿百姓立祠樹  
碑以紀德政官至右副都御史巡撫寧夏致仕歸鄉  
不乘車馬年七十卒

潭溥

潭溥昌邑人由正統進士授刑部主事用法明允案無停牘自大司寇而下率禮重之累官陝西左布政使清介不阿天順庚辰徵爲南京戶部侍郎未逾年卒櫬回行李蕭然鄉人稱之

張斐

張斐掖縣人性敏讀書過目成誦正統甲子鄉薦第一登進士累官戶部郎中奉使卒于遼東及歸葬行橐不其時重其廉

孫洪

孫洪昌邑人景泰間進士授兵部主事氣量宏深才  
識超邁嘗奉 勅選調征勦兩廣官軍陞本部郎中  
尋改禮部會 慈懿皇太后崩葬禮悉從洪議陞山  
西右叅政奉 勅往撫河南流民處置有方巡撫大  
同累立邊功陞右副都御史致仕卒于家

馮 緒

馮緒昌邑人景泰中進士授兵部主事時山海關巡  
撫非其人奏劾罷之改戶部監通徐二州租稅總管  
則遼邊儲以廉能稱自總戎而下薦留者章數上會  
內艱歸服闋賑陝右饑民賴以安擢山西右叅政累



遷甘肅巡撫都御史區畫有方恩威並行軍民仰戴  
焉

官廉

官廉平度人成化丙戌進士歷官戶部郎中爲人剛  
介嘗賑饑給餉所至有功景州等處民田萬頃界接  
東宮莊田爲內侍冒占遣廉往勘內侍語廉曰田如  
歸我講讀官可得也廉曰以萬人命易一官吾弗爲  
之卒以所占田盡歸于民

李介

李介字守正高密人成化間舉進士擢監察御史以

直諫被廷杖累遷都察院僉都御史巡撫宣府未幾  
召入佐院清簡自持不事苛刻時稱得體尋擢兵部  
侍郎值北虜犯邊奉命督軍至則徧歷城堡宣上  
威德募兵訓戰以俟征調嘗奏請修大同以禦虜上  
邊事二十餘條多見採納卒于宣府贈兵部尚書賜  
祭葬

咎 誠

咎誠高密人成化乙未進士累官兵部郎中事無巨  
細必盡心力大司馬余子俊器之嘗條奏便宜二十  
事會疾卒誠天性警敏經史不由師傅及入官猶手

不釋卷事母以孝著

宋 漢

宋漢膠州人成化辛丑進士任慶雲知縣擢監察御史按兩浙京甸革奸剔蠹大著風裁陞湖廣副使道遇疾乞歸卒于家

侯尚文

侯尚文掖縣人天性純儉力學苦志有古人風領鄉薦授平陸令興學校補廢陞凡有施爲率皆便民秩滿以繼母老疾不復仕處異母妹恩禮篤至鄉人稱爲孝友年八十三卒

劉紳

劉紳掖縣人成化甲辰進士擢監察御史嘗因天變  
建白時政得失多見採納按陝西刑獄平反者甚衆  
陞雲南副使卒于官居鄉曲犯而不校人服其量

官賢

官賢平度州人廉第成化甲辰進士任刑部主事謫  
汝州同知開渠灌田貯粟濟民累陞陝西按察司僉  
事尋督學校政聲威著卒于家

毛紀

毛紀字維之掖縣人父敏舉鄉薦教授杭郡紀幼侍

父於杭篤志力學弱冠舉成化丙午山東鄉試第一  
丁未舉進士入翰林讀中秘書弘治二年授檢討同  
考會試陞修撰充 經筵講官選侍 東宮講讀賜  
五品服癸亥修大明會典書成陞侍讀 賜給驛歸  
省 武廟卽位進左春坊左諭德兼侍講 賜金帶  
正德元年丁父艱四年服闋值逆瑾竊政削其春坊  
銜 孝廟實錄成陞侍讀學士充日講官尋陞翰林  
院學士五年擢戶部右侍郎歷陞禮部尚書 賜玉  
帶時遣使西域齎番供紀奏言西番佛國遠在數萬  
里外 祖宗雖許入貢賜法王國師名號特藉以羈

糜番衆令不爲邊患而已齋供具以媚之失 天朝  
體又以 儲嗣未建疏乞早定大計十一年以學士  
司誥勅仍掌府事 賜麟服蟒衣絛環繫帶等物十  
二年勅兼東閣大學士入閣供事隨加太子太保文  
淵閣大學士 賜蟒衣斗牛服錢寧等數導 上巡  
幸會逆濠之亂倡親征議紀等力言不可免冠伏地  
泣諸司皆泣 上諭各官退復降手勅欲出師自稱  
威武之號紀奏言人君爲天下主不宜自貶下同臣  
庶 上意稍悟十五年三載考滿加少保兼太子太  
保武英殿大學士 車駕幸宣大駐蹕居庸紀力疏

請還十六年以征濠議南幸紀等奉勅居守憂勤  
備至懇請回鑾章數十上武皇晏駕紀等密疏請  
於昭聖皇太后決策奉迎世皇入承大統於時  
逆彬統京管邊軍及錦衣官校威焰特盛禍機叵測  
復密請懿旨先擒彬黨令邊軍官校各散歸中外  
始安嘉靖元年開經筵勅同知經筵事纂修武宗  
實錄命充總裁累賜蟒衣玉帶銀幣上念定策功  
勅封紀等伯爵疏辭改廢錦衣一職世襲又改廢文  
職五品上引前代漢文加封平勃等功及我成  
祖封尚書茹瑯故事俾勉承恩命天語懇至皆力辭





山西彈劾不避尋轉左僉都御史忤逆瑾左遷通判  
撫州瑾敗復起巡撫陝西時蜀保兒寇掠漢中章選  
將練兵殲其首惡餘黨悉平漢中祠祀之仕終南京  
工部侍郎

汪翼之

汪翼之膠州人成化丁未進士擢監察御史清戎陝  
西巡按江西風裁炳著陞四川按察司副使時威茂  
土番寇擾躬詣虜營諭以禍福悉降之忤逆瑾謫知  
桐廬縣瑾敗陞廣東按察使卒

李昆

李昆高密人介子弘治庚戌進士授主事歷官都御史兵部侍郎才氣超邁每以直道忤時左遷者三操存端重言動不苟有文風以疾乞休卒

郭東山

郭東山字魯瞻掖縣人其母夢吞鶴卵而生資聰敏早孤事母篤孝弘治庚戌進士知濬縣選授御史以劾官豎忤逆瑾下獄免官瑾敗起擢四川僉事持法廉平征鴟賊有功陞兵備副使又平棘夷亂加俸一級尋陞四川右叅政致仕卒于家

鄧中和

鄧中和膠州人弘治壬子舉人任垣曲縣教諭創講堂嚴束生徒教有成績陞吏部司務轉刑部忤逆瑾改國子學錄尋陞懷慶府同知涖官清正法行不撓越二載引疾歸囊無一錢杜門不出後進階朝列大夫

高 廸

高廸膠州人字允德弘治壬子舉人任良鄉知縣遷宛平縣從容應酬不畏疆禦京輔災上疏蠲其田稅之半進太僕丞奉使宣大二鎮守臣以百金爲贖廸却之守臣曰例也廸笑曰以金之却爲例于後不亦

可乎其廉介如此

藍田

藍田字玉甫章之子神穎天成日頌數千言爲文宏肆奇拔在韓蘇間初除監察御史世廟初建言大禮廷杖幾死罷歸三十餘年不入公門惟與門生講學不倦嘗修孔廟葬孤貧遠近頌德先後論薦三十餘疏終不起卒祀鄉賢

王蓋

王蓋濰縣人字惟忠以戎籍生長京師登弘治乙丑進士任戶部主事以忤逆瑾坐監守不明除名發回

原籍茅屋蔬食談道自樂士類鄉人企慕日深後用  
御史薦復職歷陞河南巡撫都御史惠愛及民得撫  
臣體官至工部侍郎

張鉞

張鉞平度人正德間舉人始仕清苑令入覲囊無長  
物圖書數卷而已後擢南度支抽分淮安不屑奇羨  
行旅悅之陞常德知府清介如一

李鳳

李鳳昌邑人正德甲戌進士初知溫嵩行政惠民有  
瑞麥白兔之祥擢工部主事以直道出判常州尋守

壽州中都宦者恣虐鳳劾之遂罷鎮守陞戶部員外郎遷工部郎中卒

翟瓚

翟瓚昌邑人正德甲戌進士慷慨有大節初授工科給事中有直聲出爲河南僉事青羊寇反瓚首破賊巢兩省獲安歷陞湖廣巡撫副都御史歸田後日市牛酒召故舊爲樂比卒以所置田產召其主還之

任萬里

任萬里字圖南掖縣人幼孤事母極孝正德丁丑成進士初授行人使代王餽皆謝却之尋選禮科給諫

直聲爲權貴所憚。扈從世廟南巡，從官多所凌索，則力正之。亡何以疏宮僚事忤旨，歸里足不及城市，請寄尤所厭絕。唯閉戶讀書，課農教子。所有茅屋數椽，不蔽風雨。薄田不滿百畝，出入一羸馬一蒼頭，毫無貴倨態。極爲當道所重。薦章凡十九上，未及起而卒。

范階

范階字景志，卽墨人。登正德丁丑進士，爲工部郎監稅滸野，有餘貲，悉報上之。中外咸多其介，然亦以是不能飭羔鴈爲時權所恚。遂謝病歸，敝衣糲食，隱迹。

山林凡十餘年里中人見者不知其爲貴人也當途過邑往往造廬輒引避之惟以琴書自娛

王漸

王漸濰縣人正德丁丑進士爲人莊重廉潔令確山多善政召拜御史有直聲所至弊廉抑貪汚吏望風解綬去歷官至陝西副使晚年里居慎交遊不苟一介今祀鄉賢

孫夢豸

孫夢豸昌邑人正德丁丑進士初任靈寶知縣有風裁選河南道監察御史以直言出爲岳州府知府乞



休歸再起岳州府卒于官

張鯉

張鯉字子化膠州人講學以致良知爲務督學鄒公  
器之選明經任三河簿遷玉田丞內鄉令值外艱復  
補芮城歷數任止携一僕官邸亦不舉火日市胡餅  
啖之及去囊無一錢士民泣送挽留者不絕後遷鄭  
府審理會大計冢宰陸光祖舉天下清苦官鯉與焉  
奉旨賜宴優叙拘劄陞周府長史以疾致仕家居  
日用不給人有不堪者鯉處之油油如也以上壽終

趙慎修

趙慎修字敬思膠州人初任鹽城縣令百姓戴如父母嘗錄士南畿品藻最當上計稱最授職方郎後知揚州有廉明聲築大堤三百餘里漕舟民田兩利焉勅褒美之有爲苛禮中傷之者例當調當事者惜之爲補大名其治大名一如揚州居常以親老爲念一遷河南憲副之任僅三月卽請告終養投牒遂行旣歸二親相繼卒無幾慎修亦卒卒之日兩院猶疏薦之

劉祐

劉祐字淑修號拙齋掖縣人幼穎異日誦數十萬言

終身不忘十五補邑弟子員未幾舉于鄉越三載嘉靖癸丑成進士授中山司理登薦劾二十六以高第徵兵科給事中侃侃言事無所迴避壬戌選庶吉士進士某者其父貴顯賂相嵩使爲地祐直疏其事謂上品無寒門下品無世族上感其言詔罷選嵩擬試題進怒擲之地自此有逐嵩意矣都御史某嵩黨也撫閩多有不法疏劾之并總戎二人皆抵罪隨以贈公憂歸除補吏科屬大計四明宿司理嘉興侯太守被流言力爲申救得免後二公並至大僚敷歷有聲人服其鑑識轉兵科有出守淮揚故事左右諫不

當守以前貴顯者柄銓修郤故也祐怡然就道至郡  
首葺徐節孝祠梓其遺文示風勸列侯某建節督漕  
前二千石皆伏謁祐獨長揖山陽沐陽二令暴橫按  
罪罷之民有訟者涕泣誨諭輒悔罪解去郡逋賦十  
餘萬奏蠲之淮人相率祠祀晉浙江副憲備兵淮揚  
時海寇繹騷日夜逐賊戰勝捷聞賜白金文綺通泰  
鹽徒縱橫執殺官校設計誅之夷其巢淮揚民始安  
業轉金衢參政僅七月晉右僉都御史巡撫大同大  
同去虜最近桀酋俺答吉囊相繼深入祐諷咨利害  
得其要領虜不得利引去閒一入寇督兵禦之俘戰

數百奪馬牛羊千數捷聞賜賚陞級虜自是挫銳其  
部落多來降者祐治軍嚴統禱子弟不得冒功遂騰  
蜚語祐亦以念太淑人甚移疾乞歸時年方四十三  
日率其弟娛侍膝下故無厚產稍腴者悉讓以子弟  
故塾師尹罷縣佐歸窘甚分甘周乏終尹身無失禮  
幼卽嗜濂洛關閩之學晚益精詣謂學問在正心體  
不墮知見賦詩作字皆非切務薦章屢上而已絕意  
仕進太淑人病旦夕跪禱進飲食竟愈春秋登九十  
乃逝祐之卒時年七十有三

盧宗哲

盧宗哲字濟卿世居涑水自號涑西方六七歲從羣  
兒戲一道士遇之驚曰兒貴人法至三品少長工文  
辭諸生避席嘉靖乙未進士 天子躬御文華簡試  
進士得宗哲等三十人爲庶吉士讀書禁中執政李  
文康月試每讀其文未嘗不咄嗟嘆賞也丁酉授檢  
討值兩艱哀毀骨立庚子服闋甲辰同修會典丁未  
擢南司業貴遊子弟關說求出者俱不假貸辛亥滿  
考時分宜父子勢甚熾亦欲不次之擢籠宗哲乃哲  
實不持一金子世蕃遂大忤曰先生第還南吾行念  
之哲曰某來考績不來講遷官也分宜慙則以爲南

尚寶徒通議居三年乃召爲奉常提四夷館丙辰擢  
南太僕至則日夜計馬蕃息環滁之山勿問也寺有  
贖金二千或謂哲例應納笑曰豈有懷金盧濬卿哉  
戊午召爲光祿故事 上供不時予賈人值往往破  
產哲悉發羨金償之久之推戶部侍郎分宜居中不  
報已未請告歸就舊築日偃卧其中故人來則彈棋  
對酒終不請謁守吏萬曆甲戌年七十卒哲爲諸生  
時天津故有節帥過之見哲冠敝適有新冠請易哲  
爲座上一着罷酒仍着故冠而去其介如此後罷光  
祿發橐中裝餘四十金召夫人及子茂示之曰此吾

二十年宦裝可中分之矣茂伯父長史君病革呼茂昇之千金茂謝不受哲喜曰此真盧潛卿兒也

趙煥

趙煥字文光山東掖縣人嘉靖四十四年進士由工部主事改陝西道御史巡茶陝西萬曆三年巡按河南巡視京營京畿刷卷陞順天府丞累陞刑部尚書告病尋起原官轉吏部以臺中例推不與聞于總憲攻擊不已而去後再起原官管內外計典以積勞成疾卒于官

毛聚



毛聚字德玄萊州掖縣人幼有異質事繼母秦盡孝里中嘗寇至衆驚走秦不能聚獨侍左右弗去寇問曰爾不畏死耶何不避我聚泣曰我老母在敢自求活乎寇義之不忍犯父嘗病疫居崑崙山中夜渴求酒山深多虎狼聚弗憚跣走出山乞得酒以還父飲而愈與兄弟分財恣其所取而受其棄遺者長兄葬柩將及壙訛言盜且至衆懼欲奔匿聚曰兄柩在斯安忍棄之卒掩壙而還再從母殯城隅人取其磚殆盡聚買地瘞之族女六人貧不能嫁聚出私財嫁之族中不克葬者十餘喪聚皆爲葬之歲食有餘粟則

推以濟隣里貸不償者則焚其券有客宿其舍旦遺錢數百緡而行聚徒步追五十里還隣人耕侵其畔或以告聚聚曰寧知非彼地耶

孫惟中

孫惟中萊州府昌邑人世爲農長身美髯朝晡暮讀善談古今事臺臺也雅愛宋名臣言行錄亟稱之以爲省括爲寧海州史用推擇上益都會父卒皇皇如不欲生旣葬結廬其側苦塊曠野中深夜月冷哭聲依依隨悲風遠聞人爲泣下日啜淖糜二盂而止晨起掬雪頰面已輒詣墓前拜久之手足皸瘃形容憔悴

悴或勸其反哭不對事聞縣令夜半携二蒼頭往廉  
之見蕭然塊處風雪中也嘆息而去娶劉氏亦從其  
化孝子居廬三年劉亦居堊室不近酒肉者三年

遼東 附山東後

陳壽

陳壽字本仁號蠹齋其先江西新淦人洪武間伯祖志敬坐事謫戍遼東喪明不能往一子當代役弟志弘慨其兄養無所托請代戍遂籍於遼東寧遠衛壽補衛學生成化壬辰登進士性孤特不務矯訐甲午授戶科給事中丙午轉左給事中丁未進都給事中弘治戊申吏部薦爲大理寺丞尋調南京光祿寺少卿又擢南京鴻臚寺卿庚申被簡命爲右僉都御史巡撫延綏癸亥滿九載遷南京右副都御史時正德

丙寅劉瑾竊柄矯詔令致仕癸酉以廷薦起改右副都御史巡撫陝西未幾遷南京兵部右侍郎尋陞南京刑部尚書致仕嘉靖改元詔進一品階以羊酒絲幣存問於家時年八十有三矣其在戶科奉勅閱視宣大邊防劾去鎮守中官之不法者巡牧馬草場中貴有恃內庇侵尅者壽請置之法時貴妃萬氏專寵兄弟勢撼京師中官梁方輩結妖僧繼曉干撓國法壽疏論之被逮繫詔獄尋得釋 孝廟登極上封事指斥貴近無所避忌及遷大理爲忌者所指摘王端毅公恕嘗疏辯之稱其正色敢言其巡撫延綏適大

虜在邊羽書交至鎮城晝閉道塞不行壽分布兵馬  
爲十路各屯駐要害互相應援多遣覘卒哨探惟謹  
軍勢大揚虜分兵入寇躬親甲冑爲將卒先遇賊鏖  
戰擒斬八十有餘未幾火篩脫羅干諸酋糾率部落  
精兵大至先以百餘騎誘我諸將請赴之壽曰虜衆  
未可當也自出帳擁左右數十騎據胡床麾指飲食  
如無事虜望見疑之遂引去旣而諸路將領以壽方  
略邀擊賊皆大捷斬首若干級捷連上 孝廟降勅  
獎勞賜賚加俸初延綏守臣以虜勢方熾鎮兵不能  
支請發京兵比壽屢捷而 王師已至總制者請破

其巢未得 上命兵駐延綏戰馬三萬日給草束所費不貲壽議出境揚兵牧馬卽採草紆急衆恐墮賊計壽請以身先之得保無事所費省若干萬時同事者諷壽註子弟姪名戰籍中壽曰吾子弟皆不諳弓馬竟不許識者多之先是延綏守臣失事俱得罪代巡撫者難其人太宰倪文毅公岳薦壽或以爲疑倪公以問楊一清對曰是固儒將當不負公知也在鎮三年興利除害井井有條十四年本鎮歲饑題准招商納糧區畫咸中事宜本年改南臺其在南京值逆瑾竊柄勅令鈐束臺官不得妄言朝政閒讀畢壽正

色諭十三道曰言路豈可闕乎凡時政有當言非劾  
某者仍稿呈舉行若因之阻抑則負朝廷負所學多  
矣臺諫以言事忤逆瑾盡被執械繫京師壽與兵部  
尚書林瀚上疏論救壽又獨疏極言俱不報林瀚既  
得罪去未幾壽亦罷歸瑾復搜剔壽前任事諷所司  
文致罰米若干石稱貸以完家素無積至是益貧不  
能給朝夕瑾誅言官交章薦起陝西巡撫陝西兵荒  
之後兵民敝甚鎮守大監廖堂與其弟鵬姪鎡怙勢  
以逞椎剝無厭禍且及士夫家人人重足立壽下車  
旬日卽揭榜諭衆利病之原因不悉具仍令長安父



老面陳得失量斗斛平時價禁有司官市民物偶劇盜數十標掠良民捕之枷於市俱折其兩股盜賊屏息又令下曰遭喪不許停柩姻嫁不許索財人皆遵之夏大旱令各街巷開渠以通陰氣減刑殺清冤獄齋心誠禱天乃大雨仍因關中薦災乞停逋負錢糧罷額外貢獻俱報可時廖堂稱旨造絨氈帳幄數百間料價數十萬兩壽至已完解廉知其贏餘數萬兩欲輸內權貴檄所司留以備賑仍戒諭此後不得指進貢有所科取不然吾且執奏堂兄弟圖中傷之遂乞歸不允先是鎮守爪牙惡少數十輩散遣于各郡

縣衙所漁獵滋甚壽下令捕之皆逃歸氣焰大沮民稍安已而改南京兵部侍郎報至軍民數千人擁集無臺泣留壽曰君命也出城之日號呼之聲震地擁肩輿移日不得行至留都知政歸近侍佞臣屢疏乞休不允疏九上乃進刑部尚書致仕壽以貧不能歸流寓南都敝屋頽垣不蔽廳事杜門寡交聿遵古道嘉靖改元詔進一品階以羊酒果品存問于家是年九月卒於寓第貧無爲殮京兆寇公天叙大司空李公充嗣哭臨爲備殮具因具題賜祭二壇命有司營葬域

韓斌

韓斌字廷用遼東寧遠衛指揮使年十六襲職禦虜于小團山突陣斬馘數首敗之天順初陞遼東都司僉事備禦寧遠虜入寇戕其將領官軍陷焉斌馳赴手刃數賊圍遂解時義州屢失事成山伯王琮被勅切責恐甚斌請當先自効琮以五百人屬之突遇虜于八塔兒虜以四千衆圍我闕其一面斌曰彼將誤我不可忽也令營中聯馬死鬪而出擒斬甚衆虜退有鎗金文綺之賜尋充叅將分守延綏西路時北虜毛里孩擁衆十餘萬入定邊營斌率五千騎伺其歸

擊之環縣虜衆猝至圍之數重斌令我衆悉衣白以  
自別直向虜衆奮呼而出有所斬獲戒勿顧得以全  
軍而歸勅改充遊擊將軍馳驛還遼領右哨出清河  
直抵其巢斬首二百餘級俘男女百七十餘口論功  
實授都指揮僉事分守遼陽明年改充副總兵分守  
開原兼提督遼陽賊屢犯廣寧總兵官歐信會斌出  
義州直抵興中斬首百級陞署都指揮同知虜嘗入  
清河堡匿深谷中以數十騎薄城挑戰將佐爭欲擊  
之斌曰是餌我也勿貪已而伏果起斌乃背四陣番  
休更戰虜旣遁復出讎河十岔口等處搗其巢斬首

二百餘級撫寧侯朱永等受命征建州斌與總兵官侯謙復爲右哨出鴉鵝關抵泊珠江斬俘無算虜酋有宋管只八者據山險欲夜劫其營斌令譯大呼曰韓馬法在此汝尚欲爲偷乎馬法者虜所謂大人也虜衆願一見斌免胄示之皆棄弓矢羅拜馬前遂遁斌度暮至黑松林虜必有從後邀者約謙軍其地以待之而謙徑先歸比至賊果突出斌急令立營一麾而定其料敵應變類如此時天下論武臣可大將者三而斌其一焉前後十數年屢與虜鬪未嘗敗衄而爲同事者所忌斌遂以老告歸于時年甫六十日置

酒會親以爲樂時政物評未嘗掛口後十有一年享  
壽七十有二而卒

賀 欽

賀欽字克恭其先成廣寧後屯爲遼西人少穎敏沉  
厚好學偶得近思錄朝夕玩讀得其旨要遂厭俗學  
成化二年舉進士爲戶科給事中見白沙論學嘆曰  
至性不顯寶藏猶霾世卽用我而我奚以爲用卽日  
上疏解官去執弟子禮事白沙旣別肖其像懸室中  
事之甚謹泰陵初薦授陝西叅議撫治商洛以病貽  
母憂上疏懇辭且陳四事一曰資真儒以講聖學謂

今日急務莫先於講學而經筵勸講之官所謂師友之臣尤當訪求真儒以充其任二曰薦賢才以輔治道謂新會縣歷事監生陳獻章天性高明學術純正誠當世之大賢宜以非常之禮起之俾之輔養君德三曰遵祖訓以處內官謂內府監司局庫衙門載之祖訓內官條其職掌不過灑掃供養關防出入等事而已近年如王振喜寧舒良王誠曹吉祥牛玉汪直尚銘輩或陷主虜庭身叛賊境或主易儲君禁錮南內或謀爲不軌賄易后妃或邀功起釁流毒邊徼或恃寵招權納賂不貲或引用左道蠱惑上

心或導進淫巧盜虛府庫此其陷君誤國蠹政殃民  
昭昭在人耳目者也宜深鑒已往之弊永絕方來之  
禍四曰興禮樂以化天下謂陛下紹基之初罷黜浮  
屠妄誕之邪術舉行朱子喪葬之正禮真所謂守成  
業而致盛治也但初政之施方發其端而頽敗之俗  
尚仍其舊禮讓之化未行淫穢之風日甚乞申明正  
禮之當行革去教坊之俗樂疏入不報正德四年逆  
瑾括田東人驚疑思亂義州以守臣貪故遂先發聚  
衆縱火劫財大擾然相戒曰母入東街驚賀黃門欽  
往諭曰渠旣知悔卽不殺人可解鎮城當有人至爾



輩直拜跪求生慎無殺人已而撫鎮人果至須臾又  
言軍至且勦衆復呼諜曰賀黃門無謾語又趨跪于  
里門欽曰城中擾亂至此鎮城焉得不發兵兵雖至  
爾等第不殺人必宥爾無恐衆遂定城中不傷一人  
生平不務博覽專讀五經四書小學靜思默識反身  
實踐冠婚喪祭遵用家禮每教人讀白鹿洞規小學  
鄉人由是興於行義老更好易究心象數手不釋卷  
卒鄉人祠之凌溪釣臺子士諮鄉貢士博學篤行嘗  
陳十二事論王政不報辭疾歸終身不仕

傅 鏞

傅鏞字希準遼東廣寧人正德辛未進士召試授禮  
科給事中屢言當世大計其最著者諭邊事一疏大  
指言今法邊將臨敵亡卒十人以上定坐其將將畏  
坐卒不敢見虜虜無所畏得以暴苦邊民宜制自今  
虜入境能格虜者雖亡卒十人以上勿問有功者仍  
錄之其不敢見虜者卽不亡一人罪不宥 上是其  
說著爲令十年乙亥遭母喪解職服除遷工科右給  
事中本年陞太平府知府選子弟聰穎者延師教之  
暇則躬校文藝太平由是科不乏人俗好賽神費每  
不貲嚴諭禁止大旱禱雨輒應隣郡有大獄不決鏞

治之立辨在郡日久絲粟無所私庾庫充羨會歲饑  
盡發之復以餘粟爲粥於野賑旁郡之流携入境者  
所全活甚衆時撫臣及部使者以鑰才賢薦剡上以  
十數嘉靖三年拜浙江按察司副使巡視海道鑰自  
乘巨艦環弓矢出入風濤中無險不至其修置戰船  
收給月糧之法浙東至今行之八年以喪解職壬辰  
起復授河南副使專備信陽威惠懋著十二年拜山  
西按察使有富人坐殺人當死獄成矣復以賄免鑰  
收鞫之竟置於法有主簿能守官箴祗以忤當道爲  
奸人所構者事下按察司或謂鑰宜有所瞻顧鑰曰

陷人吾不爲也竟白之十三年遷四川右布政使未  
行十四年以巡撫王都御史昏夜悞杖宗室子事連  
坐左遷河南右叅議十五年陞河南副使十六年遷  
江西左叅政行之日軍民數千人遮留十八年遷福  
建右布政使本年轉河南左布政使軍民聞鑰復至  
額手胥慶尋陞都御史撫河南軍民益大喜然鑰爲  
江西時以夏日傷暑救荒跋履山谷感疾至是疾日  
益增以新受命未敢輒言去且其時河南人饑死者  
殆半而當輸粟三十萬石鑰具疏乞蠲賦一夕疏成  
而疾遂篤竟以不起 天子感鑰言切特貸河南粟

三之一其二許民出銀以貸粟河南相與哭鑰赴鑰  
之喪曰我乃從公得活而公顧死耶訃聞 上命賜  
葬鑰少孤孝養其母及居喪哀毀踰禮平生不見疾  
言遽色與人交溫厚樂易至於利誘勢怵則屹然山  
立不可動也年五十有九

對同句容縣學訓導江之鯤

督工句容縣典 史鄭乾直

本朝分省人物考卷之九十八